

ԳԼՈՒԽ ԺԶ.

ՊԱՏԵՐԱԶՄ ԵՒ ԽՈՐՀՐԴԱՅՆԱՅՈՒՄ

Մինչ մի կողմից Թիւրքիան Ազրբէջանի և բուլղարիկների միջոցող օղակում էր Հայաստանը, միւս կողմից տենդագին պատրաստութիւններ էր տեսնում, որպէսզի զէնքի ուժով վերացնէ «հայկական սեպը»: Օլթիի ածխահանքերի գրաւումից յետոյ, Անգորայի կառավարութիւնը դիմեց Հայաստանի կառավարութեան՝ պահանջելով յետ քաշել հայկական զօրքերը: Այդ առթիւ տեղի ունեցաւ գրաւութիւն Թիւրքիայի արտաքին գործոց կոմիսար Բեքիր Սամի բէյի և Հայաստանի արտաքին գործոց նախարարութեան միջև. Թիւրքիան խօսում էր Բրեստ-Լիտովսկի և Բաթումի դաշնագրերի լեզուով*): Հայաստանը Բաթումի անունն իսկ չէր ուզում լսել:

Ածխահանքերի գրաւումը, ի հարկէ, պատրուակ էր. Թիւրքիան միջոցներ էր փնտռում՝ ստիպելու համար հայերին, որ հրաժարեն Եւրոպայի միջամտութիւնից և այն դաշնագրից, որ կազմուած էր Սան-Րէմոյում և չուտով պիտի ստորագրէր Սևրում: Ընդհակառակը, հայերը հէնց Եւրոպայի և այդ դաշնագրի հետ էին կապել իրենց յոյսերը և ոչ մի հաւատ չունէին ղէպի անմիջական համաձայնութիւնը Թիւրքիայի հետ: Այդ դիտէին Թիւրքերը և պատրաստուած էին՝ Սևրին հակադրել երկաթէ բռունցք:

Այս տեսակէտից պատմական արժէքաւոր վաւերագիր է Մուստաֆա Քեմալի ճառը, որ արտասանեց Ադդային Մեծ Ժողովում՝ պատգամաւորների արած հարցապնդումի վրա. «Էֆենդիներ, ասում էր Մուստաֆա Քեմալը, մայիս 30-ին և յունիս 4-ին Արևելեան բանակի հրամանատարի կողմից հետեւեալ առաջարկներն էին եղած. 1) Կարինում գտնւող մեր պատւիրակութեան շուտափոյթ մեկնումը ղէպի Մոսկւա՝ Կարսի և Բաթումի ճամբով. 2) Հայաստանում տեղի ունեցող իսլամական ջարդերի դադարեցումը: Որովհետև հայերը նպատակ ունէին առաջին իսկ առիթով գրաւել Կարինը. Բաթումի և Բրեստ-Լիտովսկի դաշնագրերով մեր բանակի տիրապետութիւնը հայկական բանակի ղէմ արդէն ապահոված լինելով՝ պէտք է, որ գրաւենք Սարըղամիշի և Սողանլուի կիրճերը: Այս առաջարկութիւններից մանաւանդ վերջինը քննելով՝ գործադրութիւնը յարմար նկատեց և յունիս 6-ին հրաման տրւեց, որպէսզի յարձակողականի համար պատրաստութիւն լինի:

*) Տե՛ս այս գրքի վերջին մասը: